

DAP Kedah Tolak Calon Pilihan Pemimpin Pusat - Penolong Setiausaha DAP Kedah Bernama
19 April, 2013

ALOR SETAR, 19 April (Bernama) -- DAP terus bergolak apabila majoriti anggota DAP Kedah menolak calon pilihan parti pusat untuk bertanding di negeri ini pada pilihan raya umum ke-13 (PRU13).

Penolong Setiausaha DAP negeri W.H. Chee berkata mereka menolak calon pilihan DAP pusat, Seow Boon Hock yang merupakan Timbalan Pengerusi Pemuda DAPSY Kedah, bertanding di kerusi Dewan Undangan Negeri (DUN) Derga.

DAP Kedah mahukan bendahari DAP negeri Liaw Theng Hooi bertanding di kerusi itu, katanya pada sidang akhbar di sini Jumaat.

Penyandang kerusi DUN Kota Darul Aman Lee Guan Aik turut menyatakan kekecewaan dengan keputusan Setiausaha Agung DAP Lim Guan Eng yang mahukannya bersara daripada politik.

Pengerusi DAP Kedah itu menyifatkan keputusan Guan Eng itu sebagai tidak demokratik dan menyedihkan.

"Saya tidak sedih diketepikan...namun kecewa kerana Guan Eng membelakangkan kehendak akar umbi," katanya.

Pada sidang akhbar itu juga, Setiausaha Publisiti DAP Kedah Lim Sin Keat yang dicalonkan pusat bertanding di DUN Kota Darul Aman mengumumkan menarik diri bagi memberi laluan kepada Lee untuk bertanding di kerusi itu.

"Walau apa pun alasan Setiausaha Agung DAP, Lim Guan Eng, saya telah memutuskan menarik diri untuk memberi laluan kepada pengerusi DAP Kedah, Lee Guan Aik bertanding.

"Pada mulanya saya berhasrat bertanding kerusi Parlimen Alor Setar tetapi kerusi itu diberikan kepada Parti Keadilan Rakyat (PKR)," katanya.

DAP sebelum ini menuntut empat kerusi DUN selain mengekalkan Kota Darul Aman, tiga lagi ialah Derga, Bakar Arang dan Sidam serta dua kerusi Parlimen.

Kemelut itu menyebabkan DAP tidak hadir mengumumkan nama calon-calon pakatan pembangkang di Kedah bersama sekutunya PAS dan PKR di Markas PAS Kedah di sini, tiga hari lepas.

Sementara itu, Setiausaha PAS DUN Derga, Anuar Yatim menegaskan pihaknya turut menolak pencalonan Teoh dan mahukan Sin Keat bertanding di DUN Derga.

"Kami merayu supaya pandangan rakan sekutu turut diambil kira oleh DAP pusat," kata Pengarah Sekretariat Pakatan Rakyat (PR) Parlimen Pokok Sena itu pada sidang akhbar.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=943445>

